


**Fundacion 18 di Maart
ta invita henter e pueblo di Aruba
pa inauguracion
di Monumento 18 di Maart**



Dialuna 18 di Maart 11'or di mainta



Monumento 18 di Maart

Dia 18 di Maart 1996 Aruba ta recorda e di 10 anja cu e anhelo Arubano pa ta un pais ariba su mes a worde realisa. Den e lucha aki, cu a transcuri generacionnan, nos pueblo y su lidernan a haci sacrificionan grandi.

Dia 18 di Maart ta e dia ariba cual mas cu ningun otro nos ta recorda y honra esnan cu a duna nan alma y curpa pa Aruba despues di 60 anja por a bira un pais autonomo den Reino Hulandes.

Ariba e fecha aki nos ta recorda e miles di nos conciudadanonan y nos lidernan cu hunto a bataya pa un causa noble. Nos ta conmemora e memoria di Arubianonan manera defunto Henny Eman, Shon A Eman y Betico Croes cu a entrega nan mes na e lucha estatal di nos pais.

Dia 18 di Maart di e anja aki atencion lo worde duna na e lugar special cu defunto Shon A Eman a conquista den e curason di e pueblo Arubano y den e analnan di nos historia.

Na un edad hoben e a worde yama pa milita den e lucha pa Aruba por bira "Baas den su mes Cas", e causa cu tabata worde lidera pa su tata Henny Eman.

Un momento culminante pa Aruba y e jiu di tera Shon A, a bira su mision pa Hulanda na anja 1948.


Den number di 2147 Arubano e a bai entrega na su Mahestad Reina Wilhelmina e peticion pa Aruba haya un Status Separa den Reino Hulandes. E firmanan di e Arubianonan determina aki, a worde colecta den tur barrio di Aruba y a keda anca den 42 akte notarial. Un muestra impresionante di e deseo masal di e pueblo Arubano pa bira un pais ariba su mes.

Hulanda y e otro islanan tabata tin un otro opinion. Shon A sinembargo a insisti, e anhelo cu tabata brota den curason di e pueblo Arubano mester a worde scucha.

Cu e mandato y determinacion aki Shon A Eman a bai tambe Conferencia di Mesa Rondo y dia 18 di Maart 1948 e a logra e aceptacion unanime di un mocion den cual Aruba su derecho pa opta pa un Status Aparte pa promer bez a worde reconoci. Asina tambe e fundeshi di e lucha Arubano pa Status Aparte a worde poni. Dia 18 di Maart a bira e fecha cu 25 anja despues, na 1973, e hoben lider Betico Croes lo a escohe pa organisa un demostracion masal pa mustra Reino y Mundo cu ainda tabata biba den curazon di e pueblo Arubano e deseo cu tabata anca den e mocion di Shon A di 18 di maart 1948. Bao di liderazgo di Betico Croes e lucha pa Status Aparte ta haya un bida nobo y ariba 18 di Maart 1976 Aruba ta inaugura tambe su Himno y Bandera.

E monumento 18 di Maart ta duna tributo na e fecha y hechonan historico aki, na e jiu di tera stima, Shon A Eman, cu te awe no a haya un busto na su memoria, y na e determinacion di e pueblo Arubano. Graba pa eternidad den e base di e Monumento 18 di Maart ta e nombrenan di tur e 2147 Arubanonan valente cu a lanta para y pone den man di Shon A Eman un mandato cla pa resona na Hulanda: Aruba kier ta un pais autonomo den Reino Hulandes.

Pa generacionnan cu lo sigui despues, Monumento 18 di Maart su dos murayanan solido di concret lo keda pa semper como simbolo di e determinacion cu cual e pueblo Arubano a para tras di su causa y banda di C.A. (Shon A) Eman, Abogado di Pueblo, un di su jiunan di tera cu di un edad hoben a entrega su alma y curpa na e anhelo di mas grandi cu un pueblo por tin, esta e derecho pa e mes determina su destino.



Fundacion 18 di Maart
Mary Wever-Lacle
Presidente

